

قصيدة "دامي شرادة"

الشيخ عبد القادر العلمي

امبيت رباعي في طبع مزين أصولك

الحربة:

دامي شرادة * ألقيت شور الوالي سيدي سعيد * بخدود أورادة * راح عقلي منها مفقود

القسم الأول:

شفار هنادة * خلخلوني رحت بجرحي جديد * واعيون سرادة * حاجبين فتعريقة سود
نعني طرادة * قدها كرمح نبا يوم عيد * قدام الكادة * في نهار الحرب الموكود
زادت معتادة * من لقاها كاتعطيه الحديد * حربة نفاذة * سمها كيخرق البدود
نظفر بإفادة * منين تعطف لي ديك اللي نريد * فرحي يتزادى * ضد فالرقبان أو لحسود

القسم الثاني:

سارت جدادة * منين زارت ذاك القطب السعيد * حرمة وسيادة * كهف العناية بحر الجود
نعني فيادة * منين تاكت كمحدة في جريد * تظهر سيادة * دارت على الرقبان شهود
من غير زيادة * حبها فصميم دخالي شديد * فسبيل العادة * سيف حسن بهاها مجبود
ناري وقادة * في حشايا شعالة ما تبيد * حارة نفاذة * كادية وجمرها مزنود

القسم الثالث:

في بوعواده * لحقتها وأنا كانجري أوكيد * غرضي نتفادی * مع اللي تركتني مفقود
وعلى غرادة * القيتها ونا بالقلب الحديد * خيلي رجادة * والصوارم تخرق الهنود
قالت يا هذا * بعد عليا لا تضحى انكيد * سلم الإرادة * خير لك لا تمشي مطرود
بالك تتمادی * أويغويك لسانك بالنشيد * راني نشادة * والعروبي عندي موجود

القسم الرابع:

خوفي تتادی * قالت لي مولات العقل الرشيد * رايس الفرادة * لوجيبة ناير الخدود
خالفت العادة * منين شفت بعيني شلا نريد * القوم المحسادة * ويحهم ما بلغوا مقصود
ما ردت ازياة * منين دخلت لي في ذاك الوصيد * نسمع من نادى * وقال شرع الله المعبود
مثلک يتهادى * يا العاشق رسمك ماهو بعيد * حاشا تتعادی * غير كون معول موجود

القسم الخامس :

زادت وكادة * منين عرفت عشقي فيها فريد * سروري نادى * أو لجفا ميجاله
محدود

والهجر نكادة * و الفراق من ضره طرفي شهيد * والوصل إفادة * ملتقاك مبارك مسعود
ورضاك سعادة * قلت لها فى صدودك لا تزيد * غرضي نتلادا * بلهنا ونطرد الحسود
ذرة وقادة * ما يشاهدها من فكره بليد * و بخرق العادة * هديتها لضراغم لوجود